



REPUBLIKA E KOSOVËS
REPUBLIKA KOSOVA – REPUBLIC OF KOSOVO

GJYKATA THEMELORE MITROVICË

Numri i lëndës: 2022:035741

Datë: 01.02.2024

Numri i dokumentit: 05270864

PPP.nr.35/2022

GJYKATA THEMELORE MITROVICË - Departamenti i Përgjithshëm – Divizioni Civil, gjyqtari Leart Rexhaj, me bashkëpunëtoren profesionale Shqipe Sejdiu, në çështjen përmbarimore të kreditorit SH.A. KUR “M.” J.S.C., me numër fiskal, kundër debitorit R. T. për shkak të pagesës së borxhit në bazë të dokumentit te besueshëm – Kartelës së konsumatorit, për pagesën e borxhit në shumën prej 2,214.33 euro, duke vendosur lidhur me prapësimin e debitorit të ushtruar kundër urdhrit për lejimin e propozimit përmbarimor te përmbaruesit privat A.M., me seli në V, P.nr.5300/20 të datës 21.12.2020, jashtë seancës gjyqësore, me datën 29.01.2024, mori këtë:

A K T V E N D I M

I. PRANOHET pjesërisht si i bazuar prapësimi i debitorit R.T.nga M, SHFUQIZOHET pjesërisht urdhri për lejimin e përmbarimit P.nr.5300/20 të datës 21.12.2020, i lejuar nga Përmbaruesi Privat A.M, me seli në V. dhe atë për shumën e borxhit prej 1,842.94 euro, për periudhën nga data 01.01.2013 deri me datën 31.12.2018.

II. REFUZOHET pjesërisht si i pa bazuar prapësimi i debitorit, ashtu që MBETET NË FUQI pjesa tjeter e urdhrit të përmbaruesit privat A.M, me seli në V., P.nr.5300/20 të datës 21.12.2020, për shumën e borxhit prej 371.29 euro, për periudhën nga data 31.01.2019 deri me datën 30.11.2020.

III. Në rast se debitori parashtron ankesë kundër këtij aktvendimi, URDHËROHET që paraprakisht të paguaj garacionin në të holla në shumën prej 371.29 euro, si parakusht për ushtrimin e ankesës, në qoftë se dështon të paguaj atë, ankesa do të konsiderohet se nuk është parashtruar fare.

A r s y e t i m

Kreditori, SH.A. KUR “M.” J.S.C., me seli në M, më datën 21.12.2020, ka parashtruar propozim për përbirim, ndaj debitorit R. T, te përbaruesi privat A..M, me seli në V., duke kërkuar që në emër te borxhit të faturuar nga data 01.01.2013 deri me datën 14.12.2020 sipas ekstraktit të verifikuar nga librat afariste, debitori t’ia paguaj shumën e përgjithshme prej 2,214.23 euro, si dhe shpenzimet e përbarimit dhe kamatën ligjore.

Përbaruesi privat A.M, me seli në V, me urdhër përbarues P.nr.5300/20 të datës 21.12.2020, ka lejuar përbarimin sipas propozimit të kreditorit në këtë çështje përbarimore.

Ndaj urdhrit të lartcekur në afatin ligjor, ka paraqitur prapësim debitori, ku ndër të tjera ka theksuar se në propozimin për përbirim janë bërë shkelje të procedurave përbarimore e që si i tillë propozimi është i pabesueshëm, joligjor dhe është nxjerrë pa përfillur dispozitat përbarimore dhe po ashtu debitori asnjëherë nuk është njoftuar më parë në lidhje me këtë borxh pasi që nuk i’u është dërguar asnje faturë. Po ashtu, borxhi i lartcekur është parashkruar konform nenit 360 par.1 pika 1.1 të LMD-së. Gjykatës i ka propozuar që të aprovohet prapësimi i debitorit dhe urdhri përbarimor P.nr.5300/20 të datës 21.12.2020 të anulohet.

Kreditori brenda afatit ligjor, ka paraqitur përgjigje në prapësimin e debitorit, me të cilën e ka kundërshtuar prapësimin si të pa pabazuar dhe të pa arsyeshëm sepse propozimi për përbirim është paraqitur në bazë të dokumentit të besueshëm. Sa i përket pretendimeve të debitorit se i njëjti thirret në parashkrim sipas nenit 360 të LMD-së, ka theksuar se kemi ndërprerje të parashkrimit për arsy se debitori ka pranuar rregullisht shërbimet e ujësjellësit dhe kanalizimit nga kompania, e këtu sipas LMD ka novacion por debitori ka dashur t’i ikë përgjegjësive dhe ka qenë i pandërgjegjshëm. Andaj, gjykatës i ka propozuar që të bëhet ekzekutimi i propozim përbarimit nga debitori në llogari të kreditorit në shumën e borxhit të mbetur prej 2,214.23 € dhe prapësimi i debitorit të hedhet poshtë si i pa bazuar.

Gjykata, pas shqyrtimit të propozimit të kreditorit, urdhrit për përbirim, prapësimi të debitorit, përgjigjes në prapësim, si dhe shkresave tjera të lëndës, ka ardhur në përfundim se:

- prapësimi i debitorit është pjesërisht i bazuar.

Gjykata, fillmisht vlerësoi propozimin për përbirim të paraqitur nga kreditori dhe konstatoj se i njëjti është paraqitur konform dispozitës ligjore të nenit 38 të Ligji për Procedurën Përbarimore Nr.04/L-139 (në tekstin e mëtejshmë LPP-së) dhe i përmban të gjitha elementet e kërkua me këtë dispozitë, duke ia bashkëngjitur të njëjtit dokumentin e besueshëm në original,

në bazë të cilit kërkohen përmbarimi, përkatësisht ekstraktit e verifikuar nga librat afariste, i cili ekstrakt është dokument i besueshëm dhe i përshtatshëm për përmbarim, në kuptim të dispozitave të nenit 29 par.1 nën par.1.2 dhe par.3 të LPP-së, ku përcaktohet se “*përmbarimi me qëllim të realizimit të kërkesës në të holla caktohet edhe në bazë të dokumentit të besueshëm*”. *Dokumenti i besueshëm sipas këtij ligji është: 1.1. ekstraktet e verifikuar nga librat afariste për pagesën e shërbimeve komunale të furnizimit me ujë, energji elektrike dhe bartjen e mbeturinave*”, ndërsa në par.3 të këtij nenin thuhet se “*Dokumenti i besueshëm është i përshtatshëm për përmbarim po qe se në të është treguar kreditori dhe debitori, si dhe objekti, lloji, shuma dhe koha e përbushjes së detyrimit monetar*”. Për çka pretendimin e debitorit se dokumenti në bazë të cilit është lëshuar urdhri përmbarimor nuk është titull ekzekutiv dhe nuk ka tipare të përmbarueshmerisë, gjykata e mori si të pa bazuar.

Sa i përket pretendimit të debitorit, lidhur me parashkrimin e kërkesës së kreditorit, gjykata duke bërë shikimin e shkresave të lëndës, prapësimin e debitorit e ka aprovuar pjesërisht si të bazuar në kuptim të nenit 71 par.1 nën par 1.4 të LPP-së, sipas të cilit “*ka skaduar afati kohor brenda të cilit, sipas ligjit, mund të kërkohet përmbarimi*”, për shumën prej 1,842.94 euro, për periudhën nga data 01.01.2013 deri me datën 31.12.2018, për shkak të parashkrimit të kërkesës duke u bazuar në nenin 360 të Ligjit Mbi Marrdhëniet e detyrimeve nr.04/L-077, i cili është në fuqi që nga data 20.12.2012, në të cilin theksohet se “*1. Kërkesat të cilat parashkruhen për një (1) vit, 1.1 kërkesat për furnizimin e energjisë elektrike, energjisë termike, gazit, ujit dhe shërbimet e pastrimit të oxhaqeve dhe për mirëmbajtjen e shërbimit të pastërtisë, nëse furnizimi ose shërbimi është kryer për nevojat shtëpiake*“. Po ashtu në të njëjtin nen në par.2 thuhet se “*Afati i parashkrimit rrjedh nga fundi i vitiit në të cilin arrin kërkesa për pagesë*” ndërsa në par.3 është paraparë se “*Parashkrimi rrjedh edhe nëse furnizimi dhe shërbimet vazhdojnë*”. Andaj, për këtë pjesë të borxhit, pasi që kemi të bëjmë me shërbimet e ujësjellësit për nevoja shtëpiake, të cilat kërkesa hynë në kategorinë e kërkesave një vjeçare, gjykata vlerësoi se ka kaluar afati i paraparë me dispozitën e lartcekura – afati i parashkrimit, pas kalimit të së cilit afat, kërkesa e kreditorit nuk mund të realizohet përmes rrugës gjyqësore, andaj edhe vendosi si në pikën I (një) të dispozitivit të këtij aktvendimi.

Vendosja në pikën II të dispozitivit të këtij aktvendimi, duke refuzuar pjesërisht prapësimin e debitorit si të pa bazuar, erdhi pasi që për këtë pjesë të borxhit nuk kemi të bëjmë me parashkrim të kërkesës, sepse kreditori e ka ndërprerë parashkrimin duke parashtruar propozim për përmbarim me datën 21.12.2020, bazuar në nenin 369 të LMD-së, ku theksohet se “*Parashkrimi ndërpritet me paraqitjen e padisë dhe me çdo veprim tjeter të kreditorit të ndërmarrë kundër*

debitorit para gjykatës ose një autoriteti tjetër kompetent me qëllim vërtetimi, sigurimi ose realizimi të kërkesës”. Pra, urdhri përmbarimor për pjesën e borxhit që përfshin periudhën nga data 31.01.2019 e deri me datën 31.11.2020, në shumë prej 371.29 euro, ka mbetur në fuqi, pasi që për këtë pjesë të kërkesës është ndërprerë parashkrimi dhe nuk ka arritur afati i paraparë me neni 360 të LMD-së.

Gjykata, vlerësoj pretendimin e kreditorit, lidhur me ndërprerjen e parashkrimit sipas nenit 368 të LMD-së, mirëpo i njëjtë pretendim ishte i pabazuar, përfaktin se gjykata askund në shkresat e lëndës nuk gjeti ndonjë deklaratë të debitorit me të cilën e pranon borxhin e kërkuar nga kreditori, e po ashtu nuk gjeti që i njëjti të ketë bërë ndonjë pagesë në emër të këstит, të kamatës apo dhënie të sigurimit ashtu siç e kërkon dispozita e lartcekur. Andaj, gjykata konsideron se pranimi i borxhit nga ana e debitorit duhet të bëhet vetëm në mënyrë të drejtpërdrejtë me deklaratë të debitorit me gojë ose me shkrim, pranimi i borxhit duhet të jetë në atë drejtim që debitori manifeston vullnetin e tij që borxhi të pranohet në tërësi apo një pjesë e tij, përvèç deklaratës të cilën debitori i'a bën kreditorit, pranimi i borxhit mund të bëhet edhe në mënyrë të tërthortë siç është pagesa e këstит, kur për borxhin paguhet një shumë e caktuar në emër të këstит, si dhe mund të bëhet edhe me pagesën e kamatës ose dhëni e mjetit të sigurimit të kërkesës së kreditorit, pra lënia e sendit peng. Këto veprime të debitorit duhet të kenë për qëllim pranimin e borxhit, pra vet debitori është ai që manifeston vullnetin e tij që borxhi të pranohet, andaj bazuar në të cekurat më lartë e në kuptim të nenit 368 të LMD-së, gjykata vlerësoi se pagesat e rregullta nuk e ndërprenë parashkrimin, sepse ka dallim esencial në mes të pagesës së kistit dhe pagesave të rregullta, pagesa e kësteve mund të bëhet vetëm pas një marrëveshje në mes të kreditorit dhe debitorit për pagesën e një borxhi të caktuar në këste të caktuara, ndërsa pagesat e rregullta bëhen nga ana e debitorit varësisht nga shërbimet e marra nga kreditori, për këtë arsyе gjykata vlerësoi se pagesat e rregullta nuk paraqesin vullnet të debitorit për pranimin e borxhit paraprak në tërësi, mirëpo këto pagesa bëjnë shlyerjen e borxhit të parë të krijuar të debitorit në drejtim të kreditorit.

Gjykata vlerësoi edhe pretendimet tjera të debitorit dhe gjeti se pretendimet e tij janë të pa bazuara, nga se nuk hyjnë në shkaqet e parapara nga neni 71 i LPP-së, e të cilat po që se ekzistojnë mund të pengojnë përmbarimin e lejuar, po ashtu debitorit pretendimet e tij nuk i ka mbështetur në prova, ashtu siç kërkohet me nenit 69 par.4 të LPP-së, në të cilin thuhet se “*Baza për prapësim duhet të mbështetet me prova të duhura, provat për prapësim duhet të dorëzohen me shkrim, për ndryshe prapësimi do të refuzohet*”.

Në bazë të nenit 78 par.1, 2 dhe 4 të KPP-së, gjykata ka vendosur si në pikën III të dispozitivit të këtij aktvendimi, duke e urdhëruar debitorin që në rast se parashtronet ankesë kundër këtij aktvendimi, paraprakisht të paguaj garacionin në të holla si parakusht për ushtrimin e ankesës dhe gjykatës t'ia dorëzoi provën për pagesën e garacionit. Lartësia e garacionit është përcaktuar duke marr për bazë shumën e borxhit për të cilën ka mbetur në fuqi urdhri përmbarues. Si dhe është paralajmëruar debitori që nëse dështon të paguaj garacionin, ankesa do të konsiderohet se nuk është parashtruar fare.

Andaj, nga të cekurat më lartë, e në kuptim të nenit 73 të LPP-së, u vendos si në dispozitiv të këtij aktvendimi.

GJYKATA THEMELORE NË MITROVICË

Departamenti i Përgjithshëm – Divizioni Civil

PPP.nr.35/2022 me datën 29.01.2024

Gjyqtari,

Leart Rexhaj

KËSHILLË JURIDIKE:

Kundër këtij aktvendimi është e lejuar Ankesa në afat prej 7 ditësh nga marrja e të njëjtë, përmes kësaj gjykate për Gjykatën e Apelit në Prishtinë.